

09 Wachse

Musik: Oliver Herzog, Manuel Wülser, Flare
Text: Flare, Turescht
Additional Vocals: Andrina Bollinger

1. Part, Flare:

villne gohts gliich, bisch ufgwachse und scho bisch gross worde
irgendwenn ufwache im morn
luutstark i de wohnsidlig wird abgrächnet
meh als e handvoll chinder sind aaträtte
will nur de ball träffe, gwinne isch alles wo zählt
siede isch gold, silber metalräschte
spieled im wald zäme, entwickled fründschafte
herkunftslos inmitte vo sandchäschte
nimme kei samthändsche, keine isch zimperlich
kaschtanieschlachte, arschumdreihe, viel so shit
discos in wäschaalage, flause im chopf
s'herrscht chrieg mit autoritäte, dauernde zoff
jays sind umegange während de zähnpause im boll
zum muntermache während em änglisch ständig erholt
nid numme gammle, erfahriga haftet i mir
ich phalt jedi minute im chopf, das ganze bin ich

2. Part, Flare:

d'wäschaalag het zue und d'liechter sind ab
d'kaschtanie fuhl, d'verbindig zum alte viertel isch kappt
es git immer en bruch, villi ziehnd ine stadt
güff sind irrelevant, änglisch easy im job
ha kei ziit meh am tag, nume agebot schribe
wie freier am pc bi aktie wägem tageshoch z'wixe
zahle so wichtig wie fröhner es grümpelispiel
ziitigsbrichterstattige wecked de bünzli i mir
technisch fortschrittlich, doch was kümmerets mich
mir hend facebook und twitter, doch meh fründe gits nid
fuessballplätz fülled sich nid
wenn sich alli mit wärbig und like-scheiss zuemülled wie irr
fühleder mich, au ihr chönd a iisicht wachse
phalt d'wiitsicht, de us- vorem iistig z'schaffe
ha viel alti fründe, wird sie als pfiiler phalte
d'erinnerig a die ziit die bliibt erhalte

09 Wachse

Musik: Oliver Herzog, Manuel Wülser, Flare
Text: Flare, Turescht
Additional Vocals: Andrina Bollinger

Hook:

**mir wachse – uf ein schlag erwachse
verfolgt vode ziit, jede fortschritt isch gschicht
mir wachse – uf ein schlag erwachse
de vortriib isch zwingend, en stopp liit nid dinn**

**mir wachse – uf ein schlag erwachse
verfolgt vode ziit, jede fortschritt isch gschicht
mir wachse – uf ein schlag erwachse
mir wachse – uf ein schlag erwachse**

3. Part, Turescht:

däh chli bueb im chindergarte het gwüst, dass er andersch isch
obwohl er hüt ganz en andre isch
en schwache wicht, doch es muul wie en bugge wal
s'isch für däh bueb wiene superchraft
epischi wortgfächt de alltag bestimmt
jede sieg uf sis konto wie balsam für d'seel
er chan, was er macht und macht, was er wett
und i sire traumwält wird er langsam de chef
d'johr erschiined wie siite im gschichtsbuech
i zäh ziile vom chindsgi in stimmbruch
zäh johr spöter immer no wortgwandt
die alte ziite als bilder in chopf packt
und hüt zieht er gwappnet in kampf
führt sini schlachte mit ganzem verstand
d'arbet esch gmacht, er faltet sis blatt
und wirft mit sim team en schatte ufs land, lug

09 Wachse

Musik: Oliver Herzog, Manuel Wülser, Flare
Text: Flare, Turescht
Additional Vocals: Andrina Bollinger

4. Part, Turescht:

däh gross maa im lehrerzimmer het gspürt, dass er andersch isch
er weiss jetz, dass er hüt ganz en andre isch
kein schwache wicht, es sinnbild für wille und wäg
wille gha, wäg gfunde, villes erläbt
d'veränderig bliibt, erläbnis als chind
schlimmeri täg für immer verdrängt
mängisch wiilt er im stille inmitte vo ängscht
schluckt die bitteri pille als spitze vom bärg
mängisch sindem die bedingige z'sträng
perspektivene främd ire verbissene wält
er het sich über jedes hindernis kämpft
und glich fühlt sichs mängisch ah wie schlittle im dräck
mängisch gsehter nur de spiesser im mänsch
er hasst sich sälber, s'bild im spiegel schiint främd
mängisch fühlt er sich i chischtene zwängt
doch mitem chind i sim härz erklimmter de bärg, er wachsed

Hook (2x)